

Kjære medlem!

Tusen takk for at du er med og støttar arbeidet vårt i Førde Røde Kors. Medlemskapet ditt er viktig for oss, og vi håper du vil vere med oss vidare.

Pandemien har prega Førde Røde Kors også gjennom 2021. Aktiviteten har vore noko redusert, med færre arrangement og samlingar enn vi elles ville ha gjennomført. Det vil likevel ikkje seie at vi har sete stille i båten.

Besøkstenesta har gjennomført eit program med aktivitetar for frivillige og einsame eldre heile hausten, der mottoet har vore «opplevingar saman». Her har vi besøkt ulike kulturelle institusjonar og arrangert temakvelder. Med den spesielle situasjonen som har vore rundt covid-19, ser vi at dette har vore svært verdifullt for deltakarane. I samarbeid med arrangørar og innehavarar, har vi klart å gjennomføre med omsyn til smittevern.

Besøksteneste Ung er eit nytt prosjekt vi har starta opp i år, der Førde Røde Kors prøver ut eit opplegg der ungdom møter eldre. Opplegget er eit samarbeid mellom den etablerte besøkstenesta vår, og ei nyetablert ungdomsgruppe. Ein ynskjer i dette prosjektet å engasjere ungdom til møte med eldre menneske. Ut over det har vi gjennom telefon og personlege møter, greidd å halde oppe besøkstenesta tilnærma slik vi er vane med.

«Møteplassen», der ungdomar møtest til spel og sosial kontakt i fjerde etasje i Rødekorsbygget, har vi dessverre ikkje greidd å halde i gong i år, i hovudsak grunna restriksjonar. Når det er sagt. Førde Røde Kors fekk pengestøtte til oppussing og til innkjøp av nye møblar nettopp til Møteplassen, og no står lokalane fram i ny drakt. Alt ligg med andre ord til rette for ny aktivitet.

Internasjonalt kor starta opp øvingane sine rett før sommarferien, medan Internasjonal kafé i Røde Kors-bygget venta med oppstart av møteaktivitet til etter sommarferien. Kaféen ynskjer fleire frivillige velkomne, så har du ein time eller to til overs er det berre å ta kontakt.

Hjelpekorpsset i Førde Røde Kors fekk i fjor styrka vassredningsgruppa, her under sjø- og elveredning. I år har deler av fokus vore på etablering av skredgruppe i Sunnfjord. Dette krev ressursar, både økonomisk og fagleg og vi treng særleg tilskot av gode, engasjerte frivillige som likar friluftsliv om vinteren.

Takk for at du støttar den frivillige aktiviteten i Førde Røde Kors. Vi håpar du blir med oss vidare i 2022.

Med venleg helsing

Førde Røde Kors